

四庫全書

子部

欽定四庫全書

說郭卷六十一下

元 陶宗儀 撰

安城記

王孚

昔豫章太守賈萌與安城侯張普爭戰于新茨之野即  
茲地也

郡渚江川發源同會落亭石上有芝草下有紫磨金也  
鍾山臨水阻峽春夏則湍洑沸涌瀆上白砂如米兩岸各  
十餘斛呼曰米砂以之候歲若一岸偏饒則其方豐穰

羅霄山有石井天旱祠之以木投井中即雨至井溢木出乃雨止

安城南三十里電都泉其電或出否亦不為靈異

縣人有謝廩者山行歸路忽遇雲霧霧中有一人乘龜而行廩知神人拜請求隨去父曰汝無仙骨不得去也宜都建平二郡之界有五六峰參差互出上有倚石如二人像攘袂相對俗謂二郡督郵爭界於此

萍鄉西津名玉女岡天當雨輒先涌五色氣于石間俗

謂玉女被衣

萍鄉羅霄山澤水所出傍出石乳天旱吏人禱之因以  
大木長三四丈投井中即雨水懸轆井溢輒令木涌出  
而雨止蓋潛龍之穴也



南康記 鄧德明

神闕

南康縣歸義山去縣七百里下有石城高數丈遠望嵯峨靈闕騰空故老謂之神闕

金鷄

雩都縣有金鷄石傍有穴宋永初中見金鷄棲翔此穴應時飛鳴又云覆笥山平湖有石鴈浮在水每至炎氣代序則飛翔若知感候

梓樹

梓潭昔有梓樹巨圍葉廣丈餘垂柯數畝吳王伐樹作  
船使童男女挽之船自飛下男女皆溺死至今潭中時  
有歌唱之音

石桃

南康五山有石桃故老云古有寒桃生於山顛隱淪之  
士將大取其實因變成石焉

鸚鳥

歸美山有石室色如黃金號為金室有鸛鳥形色鮮潔  
自愛羽毛其隹者或鑒水向影悲鳴自絕方知孤鸞對  
鏡為不虛矣

玉臺

雩都君山上有玉臺方廣數丈週迴盡是白石柱柱自  
然石覆如屋形也四面多松杉遙眺峨峨嚮像羽人之  
館風雨之後景氣明淨頗聞山上有鼓吹之聲山都木  
客為舞唱之節



青竹杖

南野縣有漢監匠陳隣其人通靈夜嘗乘龍還家其婦懷身母疑與外人通密看乃知是隣乘龍龍至家輒化青竹杖隣內致戶前母不知因將杖去須臾光彩滿堂俄爾飛失杖乃御雙鵠還

潯陽四隱

晉翟莊字祖休湯之子以孝友著名守父操州致禮命並不就莊子矯亦高節家居無事好種竹辟命屢至嘆

曰吾焉能易吾種竹之心以從事於籠鳥盆魚之間哉  
竟不就矯子法賜節概尤佳武帝以散騎郎召客勉之  
就聘乃正色曰吾家不仕四世矣使白璧點污可乎亦  
不從之祖父子孫皆有行義世稱潯陽四隱

--	--	--	--	--	--	--	--

潯陽記

張僧鑒

廬山頂上有湖廣數頃有楊梅山桃止得於上飽噉不得將去

廬山西南有康王谷又有北嶺城天欲雨輒聞鼓角簫管之聲

鷄籠山下澗中有數處累石若有人功水常深尺餘朝夕輒有湧泉溢出如潮水時刻不差朔望尤大號為潮泉

湓城灌嬰所築建安中孫權經此城自標井地令人掘之正得故井有石銘云漢六年賴陰侯所開卜云三百年當塞塞後不滿百年當為應運者所開權見銘欣悅以為已瑞時咸異之井甚深大江有風浪此井輒動土人呼為浪井

稽亭北瞰大江南望高岳淹留遠客因以為名焉

潯陽城東門通大橋常有蛟為百姓害董奉疏符沉水中少頃一蛟死浮出

黃金山有柟樹一年東邊榮西邊枯後年西邊榮東邊枯年年如此張華曰交讓者此是也

麻姑山上人登之有物人形眼鼻口面無臂脚俗名之楓子鬼



鄱陽記

劉澄之

清灣

清灣在縣東南七里隋開皇中太守梁文謙莅官清潔  
取此灣水以自供後人思其德號為清灣

沙堆

新昌水有一沙堆在縣東北五十里其形狀如覆船鮮  
淨特異每年豐稔其沙即堆積如舊若沙移向岸其年  
儉古來相傳以為常驗



白雲城

白雲在縣西南旁對千越亭而峙焉跨古城之危瞰長江之深隋州刺史劉長卿題詩曰孤城上與白雲齊因以白雲為名

三鐵鑊

弋陽嶺上多密岩宋元嘉中有人見其岩內三鐵鑊鑊各容百斛中生蓮花他人往尋不知所在

望夫岡

鄱陽西有望夫岡昔縣人陳明與梅氏為姻未成而妖  
魅詐迎婦去明請卜者決云西北行五十里求之明如  
言見大穴深邃無底以繩懸入遂得其婦乃令婦先出  
而明所將隣人秦文遂不取明其妻乃自誓執志登此岡  
首望其夫因以名焉



九江志

何晏

神泉

廬山錦繡峰下有神泉宋紹興間皇甫履隱斯山高宗名其居曰清虛菴光宗在東宮問履所乏履曰但水差遠光宗特書神泉二字履持歸菴傍穿小井方施畚鍤而泉遂出故名

湓城

青湓山有井形如盆因號湓水城曰湓城浦曰湓浦江

州故有湓江

匡廬

匡谷先生姓匡名谷商周之際遯世隱居廬於廬山故號匡廬

泉穴

東興人家曾以木甌沉井中乃流出連樊溪甘渚得之此泉穴相通也又曰五章山絕崑嶮峭有蜜蜂依之為房其形如笠望者皆懸磴數丈然後得至其所矣

石人

虛谷東英巨山巖內有石人坐磐石上體上塵穢則興  
風濕潤則致雨晴日便舉體鮮潔朗然玉淨



丹陽記

山謙之

慈母山

江寧縣南三十里有慈母山積石臨江生簫管竹自伶  
倫采竹嶰谷其後惟此簫見珍故歷代常給樂府而俗  
呼鼓吹山今慈湖戍常禁采之王褒洞簫即稱此也其  
竹圓緻異於衆處

烈洲

江寧烈洲吳舊津所也內有小水堪泊船商客多停以



避烈風故以名焉王濬伐吳宿於此簡文為相時會桓  
玄之所也亦曰漂洲洲上有山山形似栗伏滔北征賦  
謂之烈洲

蔣山

京師南北並有連山而蔣山獨隆嵒峻異其形象龍實  
陽都之鎮也

新亭

京師三亭新亭吳舊亭也故基淪毀隆安中丹陽尹司

馬恢移創今地謝石創征亭三吳縉紳創治亭並太元  
中

石城

石頭城吳時悉土塢義熙初始加磚累甃因山以為城  
因江以為池地形險固尤有奇勢亦謂之石首城也

蔣陵

蔣陵因山以為名吳大帝陵也

張侯橋

大長安道西張侯橋者本張子布宅處也

會稽記

孔曄

軼雲蔽日

四明山高峰軼雲連岫蔽日

秦望

會稽秦望山為衆峰之傑陟境便見史記云秦始皇登之以望南海自平地以取山頂七里縣嶺孤危峭路險絕記云扳蘿捫葛然後能升山上無高木當由地迴多風所致山南有嵯峴峴裏有大城越王無餘之舊都也

映發

會稽境特多名山水峰崿隆峻吐納雲霧松栝楓柏摧  
幹竦條澄壑鏡徹清流瀉注

白樓

江夏太守宋輔於重山南白樓亭立學教授沛國桓儼  
避地至會稽聞陳業賢而往候之不見臨去入交州留  
書繫白樓亭柱而別

孫興公許元度共在白樓亭共商畧先往名達林公既

非所關聽訖云二賢故自有才情亭在山陰臨流映壑也

--	--	--	--	--	--	--	--

永嘉郡記

鄭緝之

三原灣

樂城縣三原亭去郡百二十里溪水清如鏡曩昔有得一死鮎者鬻大五六圍一鬻輒得數十斛鮎此灣無所不容有人能食者常自譬腹如三原灣無所不容

竹青

青田縣有草葉似竹可染碧名為竹青此地所豐草故名青田



青田鶴

有沐溪野去青田九里中有雙白鶴年年生子長大便  
去只恒餘父母二隻耳精白可愛多云神仙所養浮丘  
公相鶴經云青田之鶴

竹中高士

樂城張鷹者隱居頤志家有苦竹數十頃在竹中為屋  
常居其中王右軍聞而造之鷹逃避竹中不與相見郡  
號為竹中高士

官梨

青田村人家多種梨樹名曰官梨子大一圍五寸恒以供獻名為御梨吏司守視土人有未知味者梨實落至地即融汁

--	--	--	--	--	--	--	--

三齊畧記

伏琛

堯山在廣固城西七里堯巡狩所登遂以為名山頂立祠祠邊有柏樹枯而復生不知幾代樹也

臺城東南有蒲臺臺高八丈秦始皇所頓處在臺下紫馬至今蒲生猶紫似水楊而堪為箭

陽城山石盡起立嶷嶷東傾狀如相隨行青翠可掬也海上蜃氣時結樓臺名海市

不夜城在陽廷東南蓋古有日夜出此城以不夜名異

之也

秦始皇於海中作石橋海神為之豎柱始皇求為相見  
神云我形醜莫圖我形當與帝相見乃入海四十里見  
海神左右莫動手工人潛以脚畫其狀神怒曰帝負約  
速去始皇轉馬還前脚猶立後脚隨崩僅得登岸畫者  
溺死於海衆山之石皆傾注今猶岌岌東趣

曲城齊城東有萬歲水水北有萬歲亭

鄭司農常居不其城南山中教授黃巾亂乃避遣生徒

崔琰王經諸賢於此揮涕而散所居山下草如薤葉長尺餘堅韌異常土人呼為康成書帶草

始皇祭青城山築石城入海三十里射魚水變色如血者數里于今猶爾



南越志

沈懷遠

南越之地斗牛之分揚州之末土也南有大山是為秦望又有石匱峻起壁立內有金簡玉字夏禹得之以知百川之理也

秦二世五星會于南斗牛南海尉任囂知其偏霸之氣遂有志焉病且死召真定人趙佗行南海尉事故今呼為尉佗漢高帝遣陸賈立為南越王

衡陽相鄉縣有石魚山下多玄石石色黑而理若雲母



發開一重輒有魚形鱗鱗首尾宛若刻畫長數寸魚形備足燒之作魚膏腥因以名之

廣州石門之水俗云經大庾則清穢之氣分飲石門則緇素之質變即吳隱之酌飲之所也

昔有懶婦睡機上姑怒之遂走投水化為奇獸一枚可得脂三四斛燃之照紡績則暗照歌舞則明習懶之性不革也今安平七源等州峒俱有狀如山猪而小喜食苗田夫以杼軸之類掛於田頭則不敢復近矣

番禺縣有番禺二山因以為名

潮陽南有小水注海濱帶魯山其中多文貝可以解毒  
高安石室自生風峒南北二門狀若人功意者以為仙  
都又曰高安有竦石廣六十餘丈高二百許仞土人謂  
之高臺

端溪俚人岑班入山遇一寶珠徑五寸取還夜光明照  
燭俚人甚懼以火燒之雖小損猶照一室

盆元縣利山上多香林又曰威寧縣有穿州其上多珠

有九品大五分以上至一寸八九分為大品有光彩一邊小平似覆釜者名璫珠璫珠之次為走珠走珠之次為滑珠滑珠之次為礫礫礫之次為官兩珠官兩珠之次為稅珠稅珠之次為慈符珠

越王鳥狀似鳶口勾末可受二升許南人以為酒器珍於文螺不踐地不飲江湖不啜百草不下餌蟲魚唯噉木葉糞似薰陸香南人遇之既以為香又治雜瘡

綸木似穀皮可以為綿

寧浦郡東南有蘇摩嶠

馬援鑿通九真山又積石為坻以遏海波由是不復過  
漲海又曰軍安縣女子趙姬嘗在山中聚結羣黨攻掠  
郡縣着金箱齒屐恒及象頭鬪戰

--	--	--	--	--	--	--	--	--	--

廣州記 顧微

廣州廳事梁上畫五羊像又作五穀囊隨像懸之云昔高固為楚相五羊銜穀萃於楚庭故圖其像為瑞六國時廣州屬楚

桂父常食桂葉見知其神尊事之一旦與鄉曲別飄然入雲

鬱林郡山東南有一池池邊有一石牛人祀之若旱百姓殺牛祈雨以牛血和泥泥石牛背禮畢則天雨大注

洗牛背泥盡即晴

百管谿周迴丈餘水極沸涌如猛火煎油聲

海中有文魷鳥頭尾鳴似磬而生玉又曰海中多朱鼈  
狀如肺有四眼六脚而吐珠

平定縣東巨海有驛馬似馬牛尾一角又云平定縣巨  
海有水犀似牛其出入有光水為之開

熙安縣東南有固岡高數十丈岡西面為羊腸道說者  
云尉佗登此望漢

海中有大珠明月珠水精珠

懷化郡掘塹得石墨甚多精好寫書今山中多出朱石亦可以入朱硯中使

益智葉如蓑荷莖如竹箭子從心中出一枝有十子內白骨四破去之取外皮蜜煮為粽子味辛

熙安縣有孤古度樹生其號曰古度俗人無子於祠灸其乳則生男以金帛報之

五子樹實如梨裏有五核因名五子治霍亂金瘡



熙安縣東北有菖蒲澗盤石上水從上過味甘冷異于常流

蠻夷不蠶採木綿為絮

藤類有十許種續斷草藤也一曰諾藤一曰水藤山行渴則斷取汁飲之治人體有損絕沐則長髮去地一丈斷之輒便生根至地永不死

鬼目益知直爾不可噉可為漿也

鬼目樹似棠梨葉葉如楮皮白樹高大如木瓜而小邪

傾不周正味酢九月熟又有草昧子亦如之如可為糝  
用其草似鬼目

薤菜生水中可以為菹也

山有鳳鸞棲宿食其實山東有溪曰羅陽永泰中暑雨  
漲有一竹葉若芭蕉葉大隨水出

欽定四庫全書

卷六十一下

廣志

郭義恭

木實曰檳榔樹無枝略如桂其顛生穗而秀生棘針重疊其下彼方珍之以為口實亦出交趾

龍眼樹葉似荔枝蔓延緣木生子大如酸棗色異純甜無酸

荔枝青華朱實核黃黑似熟蓮子實白如肪甘而多汁似安石榴

薇蕪香草魏武帝以藏衣中蕪草綠葉紫花魏武帝以

為香燒之安息雀舉頭高八九尺張翅丈餘食大麥卵  
如甌

白玉美者可以照面出交州青玉出倭國赤玉出夫餘  
瑜玉玄玉水蒼玉皆佩用

莫難珠其色黃生東夷又有明珠又有夜光大珠皆徑  
寸或圍二寸已上出黃支形至圓置之平地終日不停  
臨邛有粉井得水汰粉則益光

獨木之橋曰權亦曰杓

珠崖人皆巢居珠崖傳曰男女皆推紒或被髮徒跣有黃甘一核有成都平蒂甘大如升色蒼黃健為南安縣出黃甘

蜀名梅為榛大如鴈子海榛皆可以為油黃梅以熟榛作之

黍有燕頤之名又有驢皮黍又曰牛黍南尾秀成赤黍馬革大黑黍或云秬黍有溫屯黃黍

宛鷄大於北鷄以供御

有雉鷹有菟鷹一歲為黃鷹二歲撫鷹三歲青鷹撫鷹  
獲麋

鷄有胡髯五指金鰲反翅之種大者蜀小者荊白鷄金  
鰲者美并州所獻吳中送長鳴鷄長倍於常鷄永昌郡  
無鷄

林檎似赤柰子亦名黑禽亦名來禽言味甘熟則來禽  
也

滎陽有白杏鄴中有赤杏有柰杏

陳倉胡桃薄皮多肌陰平胡桃大而皮脆急捉碎

蜀漢既繁芋民以為資凡十四芋有君子芋大如斗魁  
有百果芋魁大子繁多畝收百斛種一百畝葉以養蔬  
瓜之所出以遼東廬江燉煌之種為美有烏瓜魚瓜狸頭  
瓜蜜甯瓜女臂瓜龍蹄瓜羊髓瓜縑瓜瓜州大瓜如斛  
御瓜也有青登瓜大如三斗魁有桂枝瓜長二尺餘蜀  
地溫良瓜冬熟有春日瓜細小小辨宜藏正月種三月  
熟有秋泉瓜秋種十月熟形如羊角色蒼黑



永昌有漢竹圍三尺餘大者一節受一斛小者數升為  
楔榼

洛陽北邙張公夏梨海內唯有一樹常山真定梨山陽  
鉅野梨梁國睢陽梨齊郡臨淄梨廣都梨又云鉅鹿豪  
梨重六斤數人分食之上黨檉梨小而加甘新豐箭谷  
梨關以西弘農京兆右扶風界諸谷中梨多供御陽城  
秋梨夏梨

河東安邑棗東郡穀城紫棗長二寸西王母棗大如李

核三月熟在衆果之先洛陽宮後園河內汲郡棗一名  
墟棗一名安益棗東海蒸棗洛陽夏后棗安平信都大  
棗單父棗梁國夫人棗大白棗一名曰感咨小核多肌  
三星棗駢白棗灌棗此四者官園所種棗有狗牙雞心  
牛頭羊矢獼猴細腰之名又有玄棗大棗崎廉棗桂棗  
夕棗之名



番禺雜記

鄭熊

番禺二山名廣州昔有五仙騎五羊而至遂名五羊嶺  
表或見物自空而下始如彈丸漸如車輪遂四散人中  
之即病謂之瘴母

海邊時有鬼市半夜而合鷄鳴而散人從之多得異物  
村民鑿山為穴多品供雷箕雷享之名雷藏

早潮下晚潮上而水相合曰沓潮

乘風而行名鸞帆其衆如簾筏名鸞簾

閩越江北山間蠻獠啖蚯蚓脯為羞容州人好食蠶土人以為諱或云以蚯蚓為之

菖蒲澗昔刺史陸脩之所開也至今重之每旦輒傾州連汲以充日用雖有井泉不足食太元中襄陽羅友累石澗側容百許人坐遊之者以為洗心之域咸安中姚成甫嘗採菊澗側遇一丈夫謂成甫曰此澗菖蒲昔安期生所餌可以忘老於是徊翔俯仰倏然不知所終蓋仙者焉

交趾之地最為膏腴舊有君長曰雄王其佐曰雄侯其地曰雄田

犍為犍道廣南荔枝熟時百鳥肥其名之曰焦核小次曰春花次曰朝偈此三種為美次鰲耶大而酸以為醢和率生稻田間



始興記 王韶

郡東有玉山艸木滋茂泉石澄徹

秦貴陽縣閣下鼓自奔逸於臨武因名聖鼓今臨武有聖鼓城

始興城西百餘步有棲霞樓臨川王營置清暑遊馬羅君章居之因名為羅公洲樓下洲上菓木交蔭長楊傍映高梧前踈雖即城隍趣同丘壑

含涯有三城白沙城馬鞍山白鹿城



含涯有白鹿城晉咸康中郡人張魴作令十年甚有惠政白鹿羣遊取一而獻之故以為名

含涯縣有堯山堯巡狩至此立行臺也

縣下流有石室內有懸石扣之聲若磬響十餘里

秦鑿楊山桂楊山閣下鼓便自奔逸息于臨武遂之始興洛陽遂名聖鼓

桂陽貞女峽傳云秦世有數女取螺於此遇風雨一女忽化為石人今形高七尺狀如女子

英德一名湏陽峽崖壁千仞猿狖不能攀昔有樵者見  
飛仙於此

--	--	--	--	--	--	--	--

林邑記 闕名

檳榔樹大圍丈餘高十餘丈皮似青銅節如斑竹下本不大上末不小遠近為林千萬若一森秀無柯端頂有葉其葉蒂條派開破仰望沙沙如彈藪蕉於竹杪風至獨動似舉羽扇之掃天葉下繫數房房綴十數子家有數百樹雲疎如墜繩也

西南遠界有靈鷲能知吉凶覘人將死食屍肉盡乃去家人取骨燒為灰投之于水

飛魚翼如蟬飛則凌雲沉泳海底

延袤六十里土多香木金寶物產大抵與交趾同以磚  
為城蜃炭塗之皆開北戶以向日或東西無定

王范文鑄銅為牛銅屋行宮

林邑王闕明達獻金鋼指環

從林邑往金山三十餘里遠望金山嵯峨而赤城照曜  
似天澗壑谷中亦有生金形如虫豸細者似蒼蠅大者  
若蜂蟬夜行耀光如螢火

王范文先是臧獲初牧牛洞山得鯉魚私將還欲食之  
其主撿求文恐給曰將礪石還非魚也主往看果是石  
文知異看石有鐵鑄石為兩刀祝曰魚為刀若斫石入  
者文當為此國王斫石即入人情漸附之



涼州記

段龜龍

瑪瑙鍾榼

呂纂咸寧三年有人發張駿冢得玉簫玉尊玉笛瑪瑙鍾榼

同心梨

呂光時燉煌太守宋歆獻同心之梨

涼州樂

溫子昇涼州樂歌遠游武威郡遠望姑臧城車馬相交



錯歌吹日縱橫

寒服暑啜

高昌僻土有異於華寒服冷水暑啜羅閣羅閣郡人呼粥也

冬溫夏涼

祁連山張掖酒泉二界之上東西二百里南北百餘里山中冬溫夏涼宜牧牛乳酪濃好夏寫酪不用器物刈草着其上不散酥特好酪一斛得升餘酥又有仙人樹

行人山中飢餓者輒食之飽不得持去平居不可見

鹽池出石

有青鹽池出鹽正方半寸其形似石甚甜美

沈布舞馬

呂光麟嘉五年踈勒王獻大沈布善舞馬

玉璽

呂光時州人陳冲得玉璽廣三寸長四寸直看無文字

向日視之字在腹裏言光當王



交州記

劉欣期

竹鼠

竹鼠如小猫大食竹根出封溪縣

金躡屐

趙嫗者九真軍安縣女子乳長數尺不家入山聚羣盜  
常着金櫛躡屐

古度樹

古度樹不花而實實從皮中出大如安石榴色赤可食

其實中如有蒲梨者取之為棕數日不煮皆化成蟲如蟻  
有翼穿皮飛出著屋正黑

多感子

多感子黃色圍一寸

椰漿

椰子有漿截之以竹筒承其汁作酒飲之亦醉也

合浦杉

合浦東二百里有一杉樹葉落風飄入洛陽城內漢

善相者云此休徵當出王者故遣千人伐樹役夫多死  
三百人坐斷株上食過足相容

土肉為臙

九真太守陶璜立郡築城於土穴中得一白色形似蠶  
蛹無頭長數十丈大餘圍軟軟動莫能名剖腹有肉如  
猪豚遂以為臙甚香美璜啖一杯三軍盡食

鱉炙

鱉魚其形如龜十二足子如麻子可為醬色黑足似螭

在腹雌負雄而行南方作灸噉之

沙州記段國

龍涸

六月二十六日發龍涸晝夜肅肅常寒不復得脫襦袴  
將從七十二人面盡黧黑口唇青紫

白馬關

龍涸北四十里有白馬關關甚嶮峻使十八人固險雖  
萬夫亦不能前

河厲



吐谷渾於河上作橋謂之河厲長一百五十步勾欄甚嚴飾

洮水

洮水出強臺山又曰山東即洮水源山南即墊江源也

麻壘

枹罕城西有麻壘壘中可容萬衆

仇池山

仇池山號百頃上有百頃池壁立百仞一人守道萬夫

莫回

鳥鼠

鳥鼠同穴山鳥如冢雀色小白鼠小黃而無尾凡同穴地皆肥沃壤盡軟熟如人耕多生黃花紫草



說郭卷六十一下